

Als erschts do tuen ich euch grad emol e tolli Nachrecht kund  
euses schöni Dorf hendrem Brugger Bärj jo das esch meh als gsund  
ond das lieht ned nome a de Höheloft wo über Riniken lacht  
nei letschte Novämber do het doch be eus d`Nagra es EKG gmacht

Ich be de Blatter Seppeli of der ganze Wält bekannt  
beh be de Fifa Präsi gsi ond ächli e Fagant  
und lüt jetz grad em Höness a Ueli es wörd mi intressiere  
wend du entloh wersch chasch du mer dini Zelle reserviere

Goht die zweuti Gotthardröhre bachab bruched Gwönner en Chopf en chüele  
well sie chönd sech denn no lang ned als sechere Sieger fühlle  
well wenn das setti iträffe das esch s`Primitive  
jo den macht secher wede ein e Durchsetzigsinitiative

Em Fricktal und do gets e Frau so hani ghöre lüte  
die wälli schiens e ehrem Dorf d`Kuh- ond d`Cheleglogge verbüte  
als Dank för sovel Patriotismus das chasch du der danke  
werd ehre Gmei Oberfrick secher es Edelwieshömmli schänke

D`Susan Hochueli esch gar kei sparsami Frau well egal was es duet choschte  
d`Möbel för ehri Asylante tuet si em Oschte poschte  
ond s`Holz für s`Erschtauguschtfüür chaufft si ned wie soscht en Jede  
ergendneume ede Schwyz sondern bi der Ikea z`Schwede

Z`Brugg und a de Habsburgstross händ`si e Kamera montiert  
jo wiso das het mech wonder gnoh und ich hami drumm informiert  
jo die Kamera seit Polizey düeg ned wägem Schlichvercher blenke  
sondern nomme wenn en VW dorefahrt wo zum Uspoff us duet stenke

Konfettispalter z`Brugg die tüend zwar hür e neus Kostüm vorstelle  
doch d`Nachfolg überneh vom Präsi het bes jetzt no keine welle  
wiso dech niemer beerbe wot Hugo das chan ich der scho säge  
es händ doch all angst sie müesste de wede 40 Johr s`gliche Kostüm träge

Also als erschts do händ`si det d Wese fascht halbiert  
und drofabe au no grad d`lfahrt neu proporzioniert  
ond zum Schloss do düend`si denn det nochli Sand streue ond chli teere  
ond das alles nor das bem Gmeindshusplatz de neu Hippie-Bus cha chere

Vor luter Wasserleitigsbrüch ghört`me de Gmeirot säge  
legis bem Gmeindsarbeiter nümme denn de Fredhof au no z`pfläge  
gottseidank hämmer ned s`Angie Merkel als Amme well die verstoht kei Gspass  
die hätti gseit mein lieber Rolf du wir schaffen das

Jo du wäge Metgledermangel do esch es passiert  
und eusi Fraue- und Männerriege händ zäme fussioniert  
hätte die of d`Riniker Jäger glost wär das ned nötig gsi ich schwöre  
well die händs nähmli gschafft das sech be eus sogar d`Fäldhase wede vermehre

Au eusi Schütze sueched dringend Lüt wo sech lönd en Vorstand wähle  
ich wüssti dene en Kandidat de chönnti ehne wärmschtens empfähle  
wiener heisst das weisi leider ned doch jetzt fallt`mer grad i  
er esch glaub bes vor chorzem no of em Bözbärj Lehrer gsi

Zum Schluss liebi Sponsore wett euses Team wede gärn öppis flüssigs vernechte  
doch das Johr würde mer usnahmswies mol of es Glässli Wy verzechte  
well sosch schribt den de Roger Köppel wede e sim Wältwochefeuilleton  
die ghöre jo wie de neu Bondesrot au zu de Wieswyfraktion

*Der Komedi*<sub>16</sub>

Wänd er me bsueche? Ich be dehei onder „[www.komedi.ch](http://www.komedi.ch)“

Zugabervers

Als Zuegab hätt ich gärn no öber de Gauner und die Gfängniswärteri brechtet  
doch leider beni z`spot gsi die zweui send vorher scho gflöchtet